

# **MANIJJBA NGAYU NAYINDA JANGKURR NARRINDURRI BIDAWANYI.**

**1** Nayinda ngayu. Ngaki niji Bida, nanda jali ngana manijjba Jisus Krayiswanyi. Ngayu yarri-jbangka nayinda jangkurr najana. Ngayu manijjbangka nayinda jangkurr narrindurri jalili narri jungku kajana yajina, Bundus baki Kalajiya baki Kabadusiya, baki Yasiya, baki Bidiniya. Narri Krisjinmuku, narri jungkuka kajana ya-jina, baki yarrijbayi narrinya Kudwanyi nanganginmuku jandanyimuku. Narri jungkuka kajana yajina, ngala baku barri janarri jungku kingkarri nangandu. Nanaba janyulu narringi yaji. **2** Wabula kamambarra ngambalangi Buwakanya Kud, nangki mankumanku yajinyi. Mankumanku nangki narrinya, baku barri juju janarri jungku nayiba jambana. Mankumanku nangki Kud narringi, janyulu yarri-jba narrinya nanganginmuku jandanyimuku. Manijjbayi Kudwanyi nangangi Kunyba Ngarndu ngamandurri, nyulu jungunkanyi ngambalandu kurduluna. Baki yabimbaka ngambalanya ngiruka Ngarnduwanyi, ngambala ngayan-gayiykanyi nanganginkanyi jangkurranyi Jisus Krayiskanyi. Baki jala ngambala kuyu nangangi jangkurr, baki nyulu yarrijbangka ngambalanya nanganginmuku jandanyimuku Kudwanyi, nyulu manjamanjambaka ngambalangi

balki yaji. Jala ngambala ngindu muwa ngamanginkanyi balkinyi yajinyi, baki nyulu manjamjambaka ngambalangi balki yaji, nangangangangi Jisus Krayiskanyi. Janyba nangki Jisus Krayis wabangkarra kurndana ngamanginkanyi balkinyi yajinyi. Ngayu ngajakangka Kudnarringi, janyulu yabimba kaja kunyba yaji narringi, baki janarri jungku mardumardu muwa nangangi Kudkanyi, baki yalungi yingkamukuyngka marda.

<sup>3</sup> Ngambala jungkuka mirnarrijba muwa. Ngambala wajbangka Kud ngamanginkanyi kunybanyi jangkurraryi. Nyulu Buwakanya nangangi, ngambalanginkanyi mambukanyi Jisus Krayiskanyi. Yabimba nyuli kunyba yaji ngambalangi Kudwanyi. Kunybamirra yaji nyuli yabimba ngambalangi, jali nyulu manjjiba nangangi jandanyi wayka jambarri. Manjjiba nyuli Jisus Krayis janybikanyi nangka ngambalangi. Janyba nangki Jisus Krayis ngambalangi, baki mili wankijbayi. Baki nanankardi barri ngambala jingkjibangka nayi, jangambala mili wankijba marda. Ngambala jingkjibangka barri, jangambala jungku mili wanka nangandu kingkarri, kuyungangi ngambala nangangi jangkurr Jisus Krayiskanyi. Jali ngambala kuyu nangangi jangkurr, baki ngambalaki yangkalamba nangandurri. Baki nanankardi barri ngambala jungku barrinani yinini nganinyimuku, barrinani buyingkinyi nganinyimuku nangangi. Jala nangka birnandaba jibarri bardardanyi, baki nanda buyingkinyi bardarda. Baki nani barri ngambala jungku barrinani

nanda buyingkinyi nganinyi nangangi Kudkanyi.  
**4-5** Yanybaka Kud, janyulu yabimba yaji ngambalangi, baki ngambala jingkijba Kud, janyulu yabimba nanda jali nyulu yanyba, janyulu yabimba. Nayi barri janyulu yabimba nanda yaji ngambalangi, jali nyulu yanyba yabimbikanyi. Janyulu marrimba ngambalanya mardarda yurrngumba barri Kudwanyi. Janyulu marrimba ngambalanya mardarda kingkarri nangandu, nanganginyina kunybana yajina lalijina. Janyulu marrimba ngambalanya mardarda kingkarri nangandu nanamanji baku, jalija nyulu bukamba yaji. Jalija bukamba yaji Kudwanyi, baki janarri nanaba nangandu, janarri najba nanda jalija nyulu yabimba.

**6** Nanankardi barri kudanyu narri mirnarri-jba muwa. Yiningki narri jungkuka kijiyudi. Yiningki janarrinyalu linjumba kudiyamukunyi. Yiningki jayalu manku kiji narrangi. Jala narri jungkuka nani, baki yuwajiwa narri mirnarri-jba muwa, jingkijbangangi narri nayi barri. Narri jandanyimuku nangangi Kudkanyi, baki janarri jungku mili wanka nangandu kingkarri yurrngumba barri. Kudiya narri jungkuka kijiyudi nanijba barri, ngala nanda kiji jala jungku narrindu marndakaja, ngala janarri yurrngumba jungku nangandu kingkarri, baki nanankardi barri narri mirnarri-jbangka muwa.  
**7** Kudiyana barri munyajbangka yalunya yingka-muku Kudwanyi. Nyulu munyajbangka yalunya waykurri narrinya kijinyi. Nani barri nyulu balanjaka narrinya Kudwanyi. Nyulu balanjaka narrinya jala yalu wajba narrinya ki-

jinyi. Marda narringkimi mankumanku nangangi Jisus Krayiskanyi. Marda narrimi manku-mankuwa nangangi jangkurr yurrngumba barri, baki janarri jungku mili ngiruka nangangi barri. Jaliyi narri jungku ngiruka nangangi jala narri kijiyudi, baki baku barri janyulu wajba narrinya nanganginkanyi kunybanyi jangkurranyi Jisus Krayiswanyi. Nyulu walkurramirra ngambalangi barri. Miku yingka walkurra barri-nani nyulu. Yingkamukunyi jayalu wajba Jisus Krayis yalunginkanyi kunybanyi jangkurranyi, mikungangi narrinkiyanji yangkalamba nanganbunanyi jali yalu yingkamukunyi manku kiji narrangi. Jaliyi narringga yangkalamba nanganbunanyi, jungkungangi narri kijiyudi, baki miku narrimi kuyu kudanyu nangangi jangkurr. Ngala jaliyi narri kudanyu marrimba nangangi jangkurr yurrngumba, baki yuwajiwa narri jungkuka ngiruka nangangi. Baki mikuwalii kijiwanyi yabimba narrinya, narringga yangkalam-bikanyi nanganbunanyi. <sup>8</sup> Narri marukangka muwa nangangi Jisus Krayiskanyi, ngala miku narriyanyi najba nangangi mankanyi jali nyulu wanka jungku nayiba wayka jambana. Miku-mirra. Ngala narri kuyuyi nangangi jangkurr. Baki nanijba marda miku narriyti najba Jisus Krayis mankanyi, ngala narri mirnarrijba muwa nangangi. Kudanyu narri mirnarrijbangka muwa nangangi. <sup>9</sup> Yurrngumba barri narri mirnarrijba muwa nani barri, kuyungangi narri nangangi jangkurr. Narri kuyungka nangangi jangkurr, baki nanankardi nyulu marimbaka narrinya mardarda yurrngumba barri. Nyulu

marrimbaka narrinya mardarda, baki baku barri narringi ngarndu jungkuja kingkarri nangandu. Barriwa.

**10-11** Wabula wankalana, nanamuku wankalamuku jali yalu yanyba jangkurr nangangi Kudkanyi, wajbayi yalunya jangkurranyi Kunybawanyi Ngarnduwanyi Kudkanyi. Nyuli wajba yalunya jangkurranyi nangangi Jisus Krayiskanyi, janyulu jilajba wayka jambarri. Yanyba yali nanda jangkurr wankalamuku. Karu yalunjali nangangi Jisus Krayiskanyi, janyulu yabimba kunyba yaji narringi, janyulu marrimba narrinya mardarda. Narri jala ngurrranyimuku nurrungi Jumukuyngka, nanda jangkurr Kudkanyi yanybaka narringi, janyulu narrinya marda marrimba mardarda ngurrranyimuku. Janarrinya marda marrimba. Nanamuku wankalamuku, nulijba yali jingkiykanyi yaji nangangi Jisus Krayiskanyi. Nulijba yali jingkiykanyi nangangi yaji. Ningkijba yali jangkurr najana Kudkanyi. Ningkijba yali nanda jangkurr, jingkiykanyi wanyimbala janyulu badajba. Ngala mikukiyanyi yanyba Kud wanyimbala janyulu manjijba Jisus Krayis. Mikukiyanyi karu yalunya jangkurrwanyi wanyimbala janyulu badajba. Ngala yanybayi jangkurr nangangi, jayalu linjumba yingkamukunyi. Jayalu linjumba kudanyu barri, ngala baku barri yabimbaja kunyba yaji nangangi Kudwanyi. Nani barri yanybayi jangkurr najana Kudkanyi nangangi. **12** Nanamuku wankalamuku yalungki

mankumanku nanankanyi jangkurranyi jali yalu yanyba. Yalungki mankumanku nanankanyi jangkurranyi jali wajba yalunya Kudwanyi. Jali yalu yanyba nanda jangkurr nangangi Kudkanyi, nanankanyi yajinyi jalija yabimba Kudwanyi, baki yali jingkijba Kud. Yali jingkijba Kud, miku janyulu yabimba nanda yaji nanamanji jali yalu jungku wanka barri. Miku. Ngala janyulu yabimba nanda yaji baku barri. Nanda jangkurr yanybayi bakunyi yajinyi, jalija nangka janyba Jisus Krayis ngambalangi barri. Yalungi jangkurr narrangi nanijba barri. Yingkamukunyi yali karu narrinya nangangi. Manjijbayi nangangi Kunyba Ngarndu yalundurri Kudwanyi, baki yalu karuyi narrinya nangangi. Yalu karuyi narrinya nanankanyi kunybanyi jangkurranyi nanganginkanyi Jisus Krayiskanyi. Baki nanamukunyi Yanjilmukunyi kingkarri lalijina, yalu najbangka yaji kingkarrinyi. Yalu marda nulijbangka jingkiykanyi Kud. Yalu nulijbangka jingkiykanyi Kud, nanda jalija nyulu yabimba narrangi barri. Yalu marda Yanjilmukunyi jingkijbangka narrinya, narrili kuyu nangangi jangkurr Jisus Krayiskanyi, narrili kuyu nangangi yuwa. Nani barri yalu jingkijbangka narrinya, baki yalu marda mirnarrijbangka muwa narrangi.

**13** Manku narri nayinda jangkurr. Marda narrinkimi mankumanku nangangi Jisus Krayiskanyi. Marda narrinkimi kudanyu mankumanku nangangi barri. Marda narrinkimi mankumanku nangangi Jisus Krayiskanyi, jalija narri jungku kingkarri

nangandu baku. Jaliyi narri yabimba nanda jala nanganginyi jangkurrwanyi karungka narrinya yabimbikanyi, baki nanda kunyba. Baki janyulu yabimba kunyba yaji narrangi baku barri jalija narri najba Jesus Krayis. <sup>14</sup> Wabula barri jalili narrangi yanyba yabimbikanyi balki yaji, baki narrili manku nanda jangkurr. Miku narrinkiyanji kurrkunba ngalu, yabimbikanyi nanda balki yaji. Ngala nanijba barri narri jandanyimuku nangangi Kudkanyi, baki marda narrangi kimi kurrkunba ngalu yabimbikanyi balki yaji. Marda narrimi ngayangayijba nanganginkanyi jangkurranyi yurrngumba barri. Narri jandanyimuku nangangi Kudkanyi, baki marda narrimi ngayangayijba nangangi yurrngumba barri. Marda narrimi miku yabimba balki yaji barrinani narrili yabimba wabula. <sup>15-16</sup> Yabimbayi kunyba yaji narrangi Kudwanyi jali nyulu yarrijba narrinya nanganginmuku jandanyimuku. Baki nanankardi barri marda narrimi yabimba ngawamba kunyba yaji barrinani nyulu yabimbaka. Yanybayi Kud nayinda jangkurr nanganginyina najana, “Marda narrimi jungku barrinani ngayu jungku. Ngayu kudukudu. Miku ngayimi jungku balki, ngala ngayu jungkuka kunyba yurrngumba barri. Baki narri barrinani kudukudu ngaki. Marda narrimi miku jungku balki, ngala marda narrimi jungku kunyba yurrngumba barri.” Nani barri yanybayi Kud, baki nani barri marda narrimi jungku barrinani kudukudu nangangi. Marda narrimi jungku kunyba nangangi. Marda narrimi

yabimba ngawamba kunyba yaji yurrngumba barri. Barriwa.

<sup>17</sup> Narri ngajakangka Kud yajinyi, baki nyulu jananganjaka narrinya, nyulu yabimbaka nanda jala narri ngajaka. Nyulu narrangi Buwakanya Kingkarri. Jaliyi narri durrijba nangangi jangkurr, jaliyi narri ngayangayijba nanganginkanyi jangkurranyi yurrngumba barri, baki janyulu yabimba kunyba yaji narrangi. Janyulu yabimba nanamannga kunyba yaji bukambijuungka. Miku nyulimi yanyba nayi barri, “Nanda nganinyi, nyulu walkurra, jangayu yabimba kaja kunyba yaji nangangi. Ngala yingka nganinyi ngawamba nyulu bayakarda nganinyi, jangayu yabimba ngawamba bijal kunyba yaji nangangi.” Mikuwalu yanyba Kud nani barri. Ngala nyulu yabimbaka nanamannga kunyba yaji yingkanyi baki yingkanyi jala yalu ngajaka Kud yajinyi. Narri jingkjbangka Kud, janyulu karrinjarrijba bukambiju walu nangandu baku barri, baki nanankardi barri marda narringkimi najbawa, marda narrimi ngayangayijba nangangi yurrngumba barri. Barriwa. <sup>18</sup> Jaliyi nganinyi jungku balkina yuwana, baki jayalu kuyu nanda nganinyi nanankurri kurdusyurri. Jayalu karrinjarrijba nanda balki nganinyi kurdusnyina, baki jayalu yarrijba brisinyina. Ngala jaliyi yingkawanyi wajba mambuka kajanyi dungalanyi, baki yuku jayalu muningka wudumba nanda nganinyi brisinanyi. Yuku jayalu muningka wudumba, jala yingkawanyi wajba kajanyi dungalanyi. Wabula barri

narrili durrijba narrangi wankalanyi yuwa, jalili yalu karu narrinya wankalamukunyi. Narrili durrijba yalungi yuwa, ngala miku nanda kunyba yuwa durriykanyi. <sup>19</sup> Ngala wudumbayi narrinya nanamunanyi yuwananyi Jisus Krayiswanyi. Nyuli wudumba narrinya, ngala miku nyuliyanyi wajba yingka dungalanyi wudumbikanyi narrinya, ngala nangki janyba wabangkarra kurndana. Nani nyuli wudumba narrinya. Baki nanankardi barri, janyulu manjamanjamba narrangi balki yaji Kudwanyi. Janyulu manjamanjamba narrangi balki yaji, jaliyi narri kuyu nangangi jangkurr Jisus Krayiskanyi, jaliyi narri durrijba nangangi buyingkinyi yuwa, janybangangi nangki Jisus Krayis narrinkanyi balkinyi yajinyi. Wabula barri wankalana yalili wajba Kud yajinyi, jalili yalu jungku balki nangangi Jumuku. Jalili yalu ngindu muwa yalunginkanyi balkinyi yajinyi, bakili yalu wudumba bulungu jibkanyi. Wudumba yalili kunyba bulungu, kunybimirra, jala mikuyaji balkinyi nangandu. Yalili wudumba kunyba bulungu, bakili kurdanba barri. Bakili dikarrijba nanda bulungu nangangi Kudkanyi. Nani barri yalili wajba Kud bulunguni. Jisus Krayis barri, nyulu barrinani nanda bulungu jali yalu wajba Kud. Nyulu kunybimirra. Jungku nyuli kunybana yuwana Kudkanyi. Mikuyaji balkinyi nangandu. Ngala janyba nangki wabangkarra kurndana narrinkanyi balkinyi yajinyi. Manjamanjambayi narrangi balki yaji Kudwanyi, janybangangi nangki Jisus Krayis narrangi.

Nani barri nyuli yabimba yaji narrangi. Miku nyuliyanyi wajba yingka dungalanyi narrangi, ngala nangki janyba narrangi. <sup>20</sup> Wabula kamambarra, waluwa nyuli yabimba nayinda jamba marda yaji junu, nanamanji barri wabula jingkijbayi Kudwanyi nanda jalija nyulu yabimba. Yarrijba nyuli nangangi jandanyi yabimbikanyi yaji nangangi. Baku barri juju janyulu minimba yalunya nanganginkanyi jandayngkanyi, janyulu manjijba nangangi jandanyi wayka jamarri. Janyulu manjijba nangangi jandanyi janybikanyi nangka narrinkanyi balkinyi yajinyi. Nani barri yarrijbayi nangangi jandanyi Kudwanyi. Baki yabimbayi nanda yaji Kudwanyi. Manjijba nyuli nangangi jandanyi wayka jamarri, baki janyba nangki Jesus Krayis narrinkanyi balkinyi yajinyi. <sup>21</sup> Janyba nangki Jesus Krayis narrangi, baki wankijba nyuli mili. Baki nanankardi barri narri kuyungka nangangi jangkurr Kudkanyi. Mili wankambayi Jesus Krayis Kudwanyi, baki nanijba barri nyulu jungkuka kingkarri nangandu Kudnyina. Yarrijbayi Jesus Krayis wirimalaru ngambalangi Kudwanyi. Narri kuyungka nangangi jangkurr, baki narri jingkijbangka Kud, janyulu mili wankamba narrinya. Janyulu mili wankamba narrinya, narri jungunkanyi kingkarri nangandu. Nani barri narri jingkijbangka Kud, janyulu wankamba narrinya, wankambangangi nyuli Jesus Krayis waluwa barri. Barriwa.

<sup>22</sup> Nanijba barri narri jungkuka yurlurrrmba nangangi Kudkanyi. Narri jungkuka lika-

lika kurdulu nangangi barri. Narri kuyuyi nangangi duja jangkurr, narri ngayangayibayi nanankanyi jangkurranyi. Narri jungkuyi yurlurrrmba nangangi Kudkanyi, ngayangayijbangangi narri nanganginkanyi jangkurranyi. Nanankardi barri marda narrimi ngayangayijba nanankanyi jangkurranyi jali milidimba ngambalanya Jisus Krayiswanyi. Nanijba barri narri marukangka muwa yalungi bukambiluyngka jala yalu kuyu nangangi jangkurr. Marda narrimi miku yabimba balki yaji yalungi yingkamukuyngka, ngala marda narrimi kudanyu maruka muwa yalungi yurrngumba barri.

<sup>23</sup> Nanijba barri narri jungkuka barrinani buyingkinyi nganinyimuku. Jala nangka birnandaba bardardanyi, baki buyingkinyi nanda bardarda. Baki nani barri jali narri kuyu nanda jangkurr nangangi Kudkanyi, baki narrincki yangkalamba nangandurri, baki narri jungkuyi barrinani buyingkinyi nganinyimuku nangangi Kudkanyi. Nyulu narrangi Buwakanya, kuyungangi narri nangangi jangkurr. Nangangi jangkurr jungkuka duja yurrngumba barri. Mikuwalu yingkawanyi yangkalamba nanda jangkurr, jungkuka duja yurrngumba barri. Janarri jungku mili wanka yurrngumba barri, kuyungangi narri nanda duja jangkurr nangangi Kudkanyi.

<sup>24</sup> Nanda jangkurr na-jana Kudkanyi yanybaka nayi barri, “Bukambiju yalu barrinani karnba. Walajbangka wuju baki jardijbangka jalyudi. Ngala marndakaja dukujbangka nanda jal, baki janyba nangka nanda karnba. Baki nani marda nganiny-

imuku baki jibarrimuku. Jungkuka yalu mardakaja nayiba jambana, marda yalungka marda janyba. <sup>25</sup> Ngala nanda jangkurr nangangi Kudkanyi, miku nangkiyi janyba. Nangangi jangkurr jungkuka yurrngumba barri. Nangangi jangkurr jungkuka kunyba, jungkuka duja barri yalu mankunkanyi, marda durriykanyi.” Nani barri yanybaka jangkurr najana Kudkanyi. Waluwa nurri karu narrinya nanankanyi kunybanyi jangkurranyi jala miku nangkiyi janyba. Nurri karu narrinya nanamannga jangkurranyi nanganginkanyi Kudkanyi. Barriwa.

## 2

<sup>1</sup> Marda narrimi yurrngumba jungku yurlurrmaba nangangi Kudkanyi. Marda narrimi miku yabimba balki yaji yingkanyi. Marda narrimi miku nulijba yingkanyi, nangka manku-mankunkanyi narrangi, narri jungku yurlurrmaba, ngala narrija kardarda yabimba balki yaji narrangi. Marda narrimi miku ngurrunajba yingka. Marda narrimi miku yanyba balki jangkurr yingkanyi nangangi barri. Marda narrimi yingjiba barriwa barri bukamba nanda balki yaji. Marda narrimi jungku yurlurrmaba nangangi Kudkanyi. <sup>2</sup> Nanda buyingkinyi bardarda, nyulu nulijbangka ngamulunyi yurrngumba barri. Ngarabangka ngamulu, baki nyulu jardijbangka walkurra baki ngiruka marda. Baki nani barri narri marda. Jala narri yurrngumba manku nanda jangkurr nangangi Kudkanyi, jala narri yurrngumba durrijba nangangi jangkurr, baki janarri jardijba

walkurra nangangi, janarri jungku ngiruka nangangi. Nanda ngamulu kunyba bardardanyi, baki nani marda nanda jangkurr nangangi Kudkanyi, nanda kunyba narrangi. Jalili narri durrijba nangangi jangkurr, baki janarri jungku ngiruka nangangi, baki janyulu marrimba narrinya mardarda Kudwanyi. <sup>3</sup> Nanda jangkurr najana Kudkanyi yanybaka nayi barri, “Narri jingkjibangka Kud, nyulili yabimba kunyba yaji narrangi. Waluwa barri, miku narriyanyi jingkjiba nani nangangi Kudkanyi, ngala nanijba barri narri jingkjibangka Kud, nyulili yabimba kunyba yaji narrangi.” Barriwa.

<sup>4-7</sup> Marda yingka jangkurr najana Kudkanyi yanybaka nayi barri, “Yarrijba ngayi kunyba nganinyi, baki baku barri jangayu manjijba wayka jambarri. Jangayu manjijba nanankurri yajiyurri niji Siyun, jala yalungi yaji Jumukungka. Yarrijba ngayi nanda nganinyi lalanbawarr mardarda. Janyulu jungku ngiruka barrinani nanda ngiruka kurnda yundukula barrawuna. Jangayu manjijba nanda nganinyi wayka jambarri, baki janyulu jungku nanaba jambana. Bukambiju jala yalu kuyu nangangi jangkurr, jayalu mirnarrijba muwa nangangi. Baki miku nyuliyi manyirrumba yalunya.” Barriwa. Nani barri nanda jangkurr yanybaka. Jisus Krayis barri, nyulu kunybamirra narrangi. Ngala yingkamuku yalungki yangkalamba nanganbunanyi. Yali yurlwa nanganginkanyi jangkurranyi. Nanda jangkurr najana Kudkanyi yanybaka nayi barri, “Jali yalu yabimba barrawu, baki miku yaliyanyi nulijba yingamaliyn-

gka kurndanyi. Ngala janyba yali nanda kurnda. Ngala baku barri yingkawanyi nyuli yabimba barrawu nangangi Kudkanyi. Wudumba nyuli nanda kurnda jali yalu janyba, baki yarrijba nyuli yundukula nananyina barrawuna Kudkanyi. Nanda jirrinyi kurnda nanganginyina barrawuna.” Jisus Krayis barri, nyulu barrinani nanda jirrinyi kurnda ngambalangi barri jala kuyu nangangi jangkurr. Ngala nanamuku jala yalu yurlwa nanganginkanyi jangkuranyi, yalu barrinani nanamuku jali janyba nanda jirrinyi kurnda. Barriwa. Marda narrimi durrijba Jisus Krayis. Yarrijbayi nanda nganinyi mambuka ngambalangi Kudwanyi, nanda jala nanganginmirra jandanyi. Yarrijba nyuli nanda nganinyi mambuka ngambalangi. Ngala kajamuku jayalu yurlwa nangangi, jayalungka yangkalamba nanganbunanyi. Ngala narri barri, marda narrimi durrijba nangangi jangkurr kudanyu barri, baki janyulu lalanba narrinya. Nyulu jungkuka ngiruka barrinani nanda ngiruka kurnda yundukula barrawuna. Baki narri barri, narri barrinani kajamuku kurndamuku nananyina barrawuna. Narri barrinani kajamuku kurndamuku nanganginyina barrawuna Kudkanyi. Nyulu jungkuka wanka yurrngumba barri, baki nani barri nyulu yabimbaka narrinya marda jungunkanyi wanka yurrngumba barri. Marda narrimi yarrijba Jisus Krayis walkurra mambuka narrangi. Marda narrimi waki kudanyu nangangi, narrangi barrinani kudukudu nangangi barri. Marda narrimi yurrngumba ngayangayijba nan-

ganginkanyi jangkurranyi. Marda narrimi wajba Jisus Krayis narringinkanyi kunybanyi jangkurranyi, baki marda narrimi jungku yurlurrrmba nangangi yurrngumba barri. <sup>8</sup> Marda yingka jangkurr najana Kudkanyi yanybaka nangangi Jisus Krayiskanyi, “Nanda jali manjjiba Kudwanyi, nyulu barrinani dungala. Nyulu barrinani walkurra dungala yubarlina. Jaliyi nganinyi jilajba yubarlina, baki janyulu damulijba nukami dungalana, baki janyulu yirrba. Yabimbaja kiji nangangi dungalawanyi, baki janyulu yirrba wayka.” Nani barri yanybaka jangkurr najana Kudkanyi. Nanda jala yirrba wayka dungalana, nyulu barrinani yalu jala yalungka yangkalamba nanganbunanyi Jisus Krayisnanyi, jala yalu yurlwa nanganginkanyi jangkurranyi. Baki nanankardi barri janyulu yabimba kiji yalungi Kudwanyi. Janyulu daba yalunya barri, mikungangi yaliyanyi kuyu nangangi jangkurr Jisus Krayiskanyi.

<sup>9</sup> Ngala narri barri, yarrijbayi narrinya nanganginmuku jandanyimuku Kudwanyi. Narri barrinani mungkijimuku nangangi Kudkanyi. Nyulu nanda lalanbawarr mardarda narringi. Nyulu barri wirimalaru yalungi bukambijuungka wandijiyana. Narri walkurramuku nangangi, baki nyuli yarrijba narrinya karunkanyi yalunya yingkamuku nanganginkanyi jangkurranyi. Wabula barri miku narriyanyi jingkijba Kud, ngala nanijba barri narri kuyungka nangangi jangkurr, baki nyulu yabimbaka kunyba yaji narringi Kudwanyi. Narri jingkijbangka Kud, baki nanankardi barri narri durrijbangka

nangangi yuwa. Jala nganinyi jilajba mungana, baki miku nyuliyi najba yaji. Mungijbangka yaji nangangi. Ngala jaliyi nyulu kuyu mirnbi nangandu, baki yuku nyulu najbaja yaji jilaykanyi. Wabula barri waluwa narri kuyu nangangi jangkurr Kudkanyi, narri barrinani nanda nganinyi jala jilajba mungana yajina. Ngala narijba barri narri durrijbangka nangangi yuwa, baki narri barrinani nanda nganinyi jala jilajba mirnbiyudi. Nyulu najbangka yaji jilaykanyi, baki narri barri, narri jingkijbangka Kud, narri jingkijbangka jungunkanyi yurlurrmaba nangangi. <sup>10</sup>Wabula barri miku narriyanyi jingkijba Kud, miku narriyanyi jandanyimuku nangangi. Miku narriyanyi jingkijba nanda kunyba yaji, jala nyulu yuku yabimba yaji narrangi. Ngala nanijba barri narri jingkijbangka Kud, yabimba nyuli kunyba yaji narrangi, jali nyulu yarrijba narrinya nanganginmuku jandanyimuku. Barriwa.

<sup>11</sup> Narri ngakinmuku kandimuku jala ngayu kudanyu maruka muwa narrangi. Narrili jungku yalundu narriginmukunyina munkijimukunyina jalili yalu miku krisjinmuku. Narrili jungku yalundu, ngala miku yalimi dujanya narriginmuku mungkijimuku, ngala yalu barrinani nguranyimuku narrangi. Ngala narri dujanya barri mungkijimuku nangangi Kudkanyi. Kudanyu barri ngayu karungka narrinya, jala nganyingka yanyba yabimbikanyi balki yaji, baki miku ninjiyi manku nanda jangkurr. Kurrkunba nganyingkiyi ngalu yabimbikanyi nanda balki yaji. Miku ninjiyi jungku balki nangangi Kudkanyi.

Miku ninjiyi mili yabimba nanda balki yaji, jalili wabula narri yabimba. Ngala jala nganyingka yanyba yabimbikanyi kunyba yaji, baki marda ninjimi mankuwa nanda jangkurr, baki marda ninjimi yabimba nanda kunyba yaji. Marda narrimi jungku kunyba nangangi Kudkanyi. Marda narrimi yabimba kunyba yaji nangangi barri.

**12** Jawuda jala yalu miku krisjinmuku, yiningki jayalu yanyba balki jangkurr yingkamukungka narringi. Jayalunjalu karu narringi, narri jungkuyi balkina yuwana, narri yabimbayi balki yaji. Ngala jaliyi narri kudanyu durrijba nanda yuwa nangangi Kudkanyi, baki yingkamukunyi jayalu najba narrinya jungunkurri kunyba, jayalu najba narrinya yabimbikurri kunyba yaji. Nani barri jayalu najba narrinya, baki janarrinya yalu jingkijba, narri kunybamu. Baki baku barri jalija nyulu karrinjarrijba yalunya walu nangandu Kudwanyi, baki jayalu wajba Kud yalunginkanyi kunybanyi jangkurraryi narringanggi. Barriwa.

**13-14** Nayi barri marda narrimi jungku. Marda narrimi ngayangayijba nanganginkanyi jangkurraryi, narringinkanyi walkurarrayngka mambukanyi, nji Sisa. Nyulu walkurra mambuka yalungi kajana yajina, baki nyuli yarrijba yingkamuku, yalu mambukamuku bayngkani nangandu. Yingka nyuli yarrijba Kabamin mambuka yingkana yajina, baki yingka nyuli yarrijba Kabamin mambuka yingkana yajina, ngala Sisa barri, nyulu walkurramirra mambuka bukambijuungka yalungi. Nyuli yarrijba yalunya mambukamuku bayngkani nangandu,

yalu lalanbikanyi yaji. Jala yingkawanyi yabimbaka balki yaji, baki jayalu kuyu nanda nganinyi nangandurri mambukarri. Jayalu karrinjarri-jba walu nangandu mambukana, baki janyulu ngirrwa nangangi, janyulu daba nanda balki nganinyi. Ngala jala yingkawanyi nyulu yabimbaka kunyba yaji, baki jayalu kuyu nanda marda nangandurri mambukarri, baki janyulu wajba nanda nganinyi nanganginkanyi kunybanyi jangkurraryi mambukawanyi. Nani jayalu lalanba yaji nangangi walkurrayngka mambukanyi Sisakanyi. Barriwa. Marda narrimi jungku kunymamba nanganginyina yuwana walkurraryina mambukana. Baki marda narrimi jungku kunymamba nanganginyina yuwana, nananyina mambukana jala narringinyina yajina. Nyuli yarrijba yalunya mambukamuku Kudwanyi, baki nanankardi barri marda narrimi ngayangayijba yalunginkanyi jangkurraryi. <sup>15</sup> Marda narrimi jungku yurlurrmaba nangangi Kudkanyi yurrngumba barri. Jawudamuku yalu mudumuku. Miku yalimi jingkijba Kud. Yalili yanyba narrangi, narri jungku balki. Ngala jala yalu najba narrinya jungunkurri yurlurrmaba nangangi Kudkanyi, baki jayalu jingkijba. Jayalu jingkijba, miku yalungi jangkurr duja. Jayalu najba nanda kunyba yaji jala narri yabimba, baki jayalu jingkijba, yalungi jangkurr narrangi jujambawarr jangkurr. Baki miku jayalu mili yanyba narrangi, narri jungkuka balki. <sup>16</sup> Marda narrimi jungku kunyba yurrngumba barri. Marda narrimi ngayangayijba nanankanyi yuwanyi

Kabaminkanyi. Marda narrimi ngayangayijba nanankanyi yuwanyi. Ngala nanamuku Kabamin mambukamuku, miku yalimi narringi wirimalaru. Ngala ngawamba Kud, nyulu wirimalaru narringi. Marda narrimi jungku yurlurrimba nanganginyina yuwana yurrngumba barri. Baki marda narrimi miku yabimba balki yaji, baki ngadijba nanda balki yalunbunanyi. Baki marda narrimi mankuwa nayi marda, nanamuku Kabamin mambukamuku, yalu nerringi mambukamuku, ngawambangangi yarrijbayi yalunya mambukamuku Kudwanyi. Marda narrimi ngayangayijba yalunginkanyi jangkuranyi, yarrijbayingangi yalunya Kudwanyi mambukamuku nerringi. Marda narrimi jingkijba Kud, nyulu nerringi wirimalaru, baki marda narrimi ngayangayijba nanganginkanyi yuwanyi yurrngumba barri. Narri wakiwarrmuku nangangi, nulijbangangi narri wakinkanyi nangangi.

<sup>17</sup> Marda narrimi maruka muwa yalungi krisjinmukuyngka. Marda narrimi lalanba yalunya. Marda narrimi maruka muwa yalungi barrinani narri maruka muwa narringinkanyi mungkijimukuyngka. Baki marda narrimi maruka muwa yalungi bukambijuungka marda. Marda narrimi miku yurlwa yalungi, ngala marda narrimi yabimba kunyba yaji yalungi. Marda narringkimi najbawa nangangi Kudkanyi, jingkijbangangi narri Kud, janyulu karrinjarrija bukambiju walu nangandu baku barri. Baki marda narrimi ngayangayijba nanganginkanyi yuwanyi, walkurrayngka kabaminkanyi mambukanyi niji Sisa. Barriwa.

18 Jawuda narrangi, narri wakiwarrmuku. Marda narrimi miku yurlwa nanganginkanyi jangkurranyi, nganyingkanyi mambukanyi, ngala marda narrimi ngayangayijba nanganginkanyi jangkurranyi yurrngumba barri. Jaliyi narri waki nangangi, kunybanyi mambukanyi, baki marda narrimi ngayangayijba nanganginkanyi jangkurranyi. Ngala jaliyi nyulu balki mambuka, baki yuwajiwa barri marda narrimi ngayangayijba nanganginkanyi jangkurranyi. 19 Jaliyi narri jungku kunyba nganyingkanyi mambukanyi yurrngumba barri, baki janyulu mirnarrijba muwa Kud narrangi. Janyulu mirnarrijba muwa narrangi, baki janyulu yabimba kunyba yaji narrangi. Jaliyi narri waki nangangi balkinyi mambukanyi, baki yiningki janarrinya daba. Ngala marda ninjimi yuwajiwa jungku kunyba nangangi, jingkijbangangi narri Kud, nyulu nulijbangka narrangi, narri jungunkanyi kunymamba narrinkanyi mambukanyi. Jaliyi narri jungku kunymamba nangangi, narrinkanyi balkinyi mambukanyi, baki janyulu yabimba kunyba yaji narrangi Kudwanyi. 20 Ngala jaliyi narri jungku balki nangangi narrinkanyi mambukanyi, baki yiningki janarrinya daba. Ngala marda narrimi miku ngarrangarra muwa nangangi, dabangangi narrinya, narrangi jungkuyi balki nangangi. Ngala jaliyi narrinya daba, ngala miku narriyanyi jungku balki nangangi, baki yuwajiwa barri marda narrimi miku ngarrangarra muwa nangangi. Jaliyi narri

jungku mardumardu muwa nangangi, jala nyulu muningka daba narrinya, baki janyulu mirnarrijba muwa Kud narrangi. Janyulu kudanyu mirnarrijba muwa narrangi.

<sup>21</sup> Mankuwa narri Kud. Nyuli yarrijba narrinya nanganginmuku jandanyimuku. Baki mankuwa narri Jisus Krayis marda. Bababanyaamba nyulu narrinya. Yingkamukunyi yali daba Jisus Krayis, linjumba yali kudanyu barri, kurdanba yali. Janyba nangki Jisus Krayis ngambalangi barri. Ngala miku nyuliyanyi nanankardi jungku ngarrangarra muwa yalungi. Miku. Baki nani barri marda narrimi jungku marda. Marda narrimi miku ngarrangarra muwa yalungi mambukamukuyngka jala narrinya daba. Marda narrimi yurrgumbra jungku barrinani nyuli jungku Jisus Krayis.

<sup>22</sup> Miku nyuliyanyi jungku balki, ngala yurrgumbra nyuli jungku yurlurrrmba nangangi Kudkanyi. Miku nyuliyanyi yabimba balki yaji. Miku nyuliyanyi jujamba yaji. Miku yaliyanyi manku Jisus Krayis yanybikurri balki jangkurr. Miku. <sup>23</sup> Jali yingkamuku yalu yanyba balki jangkurr nangangi, baki miku nyuliyanyi jananganja yalunya balkinyi jangkurraryni. Jali yalu daba Jisus Krayis, baki miku nyuliyanyi yanyba yalungi, jayalunya daba Kudwanyi. Miku nyuliyanyi yanyba nani yalungi, jali yalu daba, ngala wajba nangki nangangi Kudkanyi. Nyuli jingkijba Kud, nyulu jungkuka yurlurrrmba nangangi yurrgumbra barri. Nyuli jingkijba Kud, janyulu minimba yalunya nangangi Jisus Krayiskanyi, nyulu jungkuka kun-

yba yurrngumba barri. Nanankardi barri nangki wajba nangangi Kudkanyi, jali yalu yabimba kiji nangangi. <sup>24</sup> Ngambala yabimbaka balki yaji bukambijunyi. Kaja balki yaji ngambala yabimbaka, baki marda nyulimi daba ngambalanya Kudwanyi. Marda nyulimi linjumba ngambalanya mankanyi. Marda ngambalakimi janyba, jungkungangi ngambala balki nangangi barri. Ngala miku. Janyba nangki Jisus Krayis ngamanginkanyi balkinyi yajinyi. Yali linjumba Jisus Krayis mankanyi kudanyu barri. Baki janyba nangki wabangkarra kurndana ngambalangi barri. Jaliyi ngambala ngayangayijba nanganginkanyi jangkuranyi, baki janyulu manjamanjamba ngambalangi balki yaji Kudwanyi. Miku ngambalanyiyi daba Kudwanyi, janybangangi nangki Jisus Krayis ngambalangi barri. Nanankardi barri marda ngambalakimi yangkalamba ngamanbunanyi balkinanyi yajinanyi. Marda ngambalakimi yangkalamba nangandurri Jisus Krayisyurri, baki marda ngambalimi jungku yurlurmiba nangangi barri. <sup>25</sup> Nanamuku jibmuku, yalu jilalajbangka, baki jarrba yalu karnba. Ngala kudiyana yalu yakika munjimunji. Ngala jilajbangka nanda lalanbawarr jibkanyi, nyulu wakarambaja yalunya, baki wiykunumbaja barrikiyurri kalawuyngkurru. Wabula barri narri barrinani jib jala yakika, jala mikuyaji lalanbawarrayngka lalanbikanyi yalunya. Mikuyaji nangangi lalanbikanyi narrinya. Ngala nani-jba barri nyulu lalanbaka narrinya Jisus Krayiswanyi. Kudanyu barri nyulu lalanbaka nar-

rinya, baki miku narriyi jungku barrinani yakika. Nyulu wiykunumbaka narrinya nangandurri Kudyurri. Nyulu kurrkunkaba narrinya jungunkurri balki nangangi Kudkanyi. Nyulu kunyba lalanbawarr narrangi. Barriwa.

### 3

<sup>1-2</sup> Narri ngayangayijba nanankanyi nganyingkanyi mambukanyi, baki nani marda narri jibarrimuku, marda narrimi ngayangayijba nanankanyi nganyingkanyi nawinganjanyi. Jaliyi nganyi nawinganja, miku nyulimi krisjin, baki yuwajiwa barri marda ninjimi ngayangayijba nganyingkanyi nawinganjanyi. Marda ninjimi jungku yurlurrrmba nangangi Kudkanyi yurrngumba barri. Jala nanangini nawinganjawanyi najbangka nangangi maninganja jungunkurri yurlurrrmba yurrngumba, baki yiningki janyulu marda kuyu nangangi jangkurr Kudkanyi. Nanda maninganja barri, marda nyulimi miku yanymimba nanankanyi nawinganjanyi nangangi Kudkanyi, ngala marda nyulimi jungku kunyba nangangi Kudkanyi. Jalija nyulu najba nangangi maninganja jungunkurri kunyba nawinganjawanyi, baki janyulu jingkijba, nangangi maninganja jungkuka kunyba, kuyungkangangi nyulu nangangi jangkurr Kudkanyi. <sup>3-4</sup> Narri jibarrimuku, marda narrinkimi miku mankumanku nanijba, “Jangaka kunymamba mankanyi baki nyungka, yalu naykanyi ngana. Janga wajba kajanyi dungalanyi wudumbikanyi kunyba jumbala baki

murranyumurrary. Janga jungku kunybayudi jumbalayudi baki murranyumurraryudi.” Marda narringkimi miku mankumanku nani. Miku nyulimi ningkijba nganyi mankanyi baki jumbala Kudwanyi. Miku nyulimi nulijba nganyi, ninji jungunkanyi jirdi kunybanyi jumbalanyi. Balkibaja nanda jumbala baku barri. Ngala nyulu nulijbangka nganyi, ninji jungunkanyi kunyba nanganginyina yuwana. Nyulu nulijbangka nganyi, ninji marukankanyi muwa yalungi yingkamukuyngka, ninji yanybikanyi kardarda jangkurr yalungi, ninji lalanbikanyi yalunya. Nani barri nyulu nulijbangka nganyi jungunkanyi. Baki janyulu kudanyu maruka muwa nganyi, jaliyi ninji jungku nani barri. <sup>5</sup> Wabula barri kamambarra, jawuda jibarrimuku jali durrijba nangangi yuwa Kudkanyi, yali jungku kunyba nani nangangi. Yali jingkijba Kud, janyulu yabimba nanda jali nyulu yanyba janyulu yabimba. Yali kuyu nangangi jangkurr kudanyu barri, baki nanankardi yali ngayangayijba yalunginkanyi nawinganjanyi. Baki nyuli mirnarrijba muwa Kud yalungi kudanyu barri, jali yalu jungku kunyba nani barri nangangi. <sup>6</sup> Nanda wankalanyi jibarri niji Sara, nyuli jungku nani barri. Nyuli jungku kunyba nangangi Kudkanyi. Nyuli maninganja nanankanyi wankalanyi niji Yabrayam. Nyuli ngayangayijba nanganginkanyi jangkurranyi, nyuli mirnarrijba muwa nangangi, baki jali nyulu yanyba nangangi, baki nyuli nijarrijba “Mambuka”. Narri maninganjamuku yalungi, marda narrimi

ngayangayijba narrinkanyi nawinganjanyi nani marda. Marda narrimi miku marrala yajinyi, ngala marda narrimi jungku kunyba nangangi narrinkanyi nawinganjanyi, barrinani jungkuyi Sara kunyba nangangi Yabrayamkanyi. Barriwa.

**7** Baki ninji nawinganja nangangi, ninji jingkjibangka yalunya jibarrimuku, miku yalimi ngiruka mankanyi barrinani nganinyimuku. Marda ninjimi lalanba nganyi maninganja. Marda ninjimi maruka muwa nangangi yurrngumba barri. Nimbala maykarra, jaliyi nimbalala jungku malumba nani barri, baki janimbala jandanyiwuya nangangi Kudkanyi, janimbala jungku mili wanka nangangi Kudkanyi yurrngumba barri. Ngala ninji nawinganja, jaliyi ninji miku jungku kunyba nganyingkanyi maninganjanyi nani barri, baki miku nyuliyi manku nganyi jangkurr Kudwanyi. Miku nyuliyi manku nganyi jangkurr jalija ninji yanyba mududu nangangi. Barriwa.

**8-9** Baki yingka jangkurr ngayu yanybaka narrangi. Narri Krisjinmuku, marda narrimi malumba jungku barrinani mungkijimuku. Marda narrinkimi maruka muwa. Marda narrinkimi lalanba barrinani narri lalanba yalunya narrinmuku mungkijimuku. Marda narrinkimi miku barrarrakijba. Jaliyi yingkawanyi muningka yabimba balki yaji nganyi, baki marda ninjimi miku yabimba balki yaji nangangi. Jaliyi yingka nyulu ngarrangarra muwa nganyi, baki marda ninjimi miku ngarrangarra muwa nangangi. Ngala

marda ninjimi yabimba ngawamba kunyba yaji nangangi yurrngumba barri. Baki marda ninjimi yanyba mududu nangangi Kudkanyi nanankanyi yingkanyi. Marda ninjimi ngajaka Kud, nyulu yabimbiji kunyba yaji nangangi marda. Marda ninjimi ngajaka Kud nani nangangi, yarrijbangangi narrinya Kudwanyi, narri yabimbikanyi kunyba yaji yalungi bukambiluyngka. Jaliyi narri jungku nani, baki janyulu yabimba kunyba yaji narrangi marda Kudwanyi. <sup>10</sup> Nanda jangkurr najana Kudkanyi yanybaka nayi barri, “Nanda jala nulijbangka jungunkanyi wanka yurrngumba nanankanyi jala malbungujba mankanyi, baki bardibardingujba mankanyi, nanda jala nulijbangka jungunkanyi mirnarrijba muwa yurrngumba barri, baki marda nyulimi miku yanyba balki jangkurr yingkanyi. Marda nyulimi miku yanyba jujambawarr jangkurr. Marda nangkimi kurrkunba yanybikanyi balki nani barri. <sup>11</sup> Marda nangkimi yangkalamba nanamunanyi balkinanyi yajinanyi. Marda nyulimi miku mili yabimba balki yaji, ngala marda nyulimi yabimba kunyba yaji yalungi yurrngumba barri. Marda nyulimi miku jakakajba yalunya, ngala marda nyulimi yurrngumba jungku mardumardu muwa yalungi. <sup>12</sup> Marda nyulimi jungku nani barri, lalanbakangangi Kudwanyi. Nyulu lalanbaka yalunya jala yalu jungku yurlurrmaba nangangi. Jala nyulu yanybaka mududu nangangi Kudkanyi, baki mankuka nangangi jangkurr Kudwanyi, baki nyulu yabimbaka yaji nangangi

marda. Nyulu yabimbaka nanda yaji jala ngajaka nanangini nganinyiwanyi. Ngala jaliyi nangka yangkalamba nanganbunanyi Kudnanyi, baki miku nyuliyi manku nyulu yanybikurri nangangi Kudwanyi. Miku nyuliyi yabimba yaji nangangi." Nani barri nanda jangkurr najana Kudkanyi yanybaka.

**13-14** Jaliyi narri jungku yurlurrrmba nangangi Kudkanyi yurrngumba barri, baki janyulu lalanba narrinya yurrngumba. Yiningki jayalu manku kiji narrangi, yiningki janarrinya linjumba, ngala marda narrimi miku marrala yalungi, marda narrimi miku balkijba muwa yajinyi. Marda narrimi yuwajija jungku kunyba yalungi, baki janarri mirnarrijba muwa. **15** Marda narrimi ngayangayijba nangangi, narrinkanyi mambukanyi Jisus Krayiskanyi. Marda narrinkimi mankumanku nangangi Jisus Krayiskanyi. Marda narrimi wajba Jisus Krayis narrinkanyi kunybanyi jangkurranyi, nyulungangi narrangi wirimalaru. Jaliyi yingkawanyi ngajaka narrinya, yanka narri jingkijba Jisus Krayis, janyulu lalanba narrinya, jaliyi yingkawanyi ngajaka narrinya nani, baki marda narrimi karu yajinyi. Marda narrimi karu nangangi Jisus Krayiskanyi, baba-banyamba nyulu narrinya, kuyungangi narri nangangi jangkurr. Baki nanankardi barri janarri baku jungku kingkarri nangandu yurrngumba barri. Nani barri marda narrimi karu. **16** Ngala marda narrimi yanyba kardarda jangkurr nangangi. Marda narrimi miku ngirrwa nangangi, marda narrimi miku jakakajba,

ngala marda narrimi yanyba kardarda jangkurr nangangi. Jaliyi yingka yanyba balki jangkurr yingkanyi nganyingkanyi, baki marda ninjimi miku yanyba balki jangkurr yingkanyi nanganginkanyi. Marda ninjimi miku yanyba balki jangkurr nanganginkanyi nani barri. Nganyingka yanybaka muwa, ninji jungkuka kunyba, jaliyi ninji miku yanyba balki nani. Jaliyi yingka yanyba balki jangkurr yingkanyi nganyingkanyi, ngala ngawamba ninji yanyba kunyba jangkurr nangangi, baki janinji jungku mardumardu muwa. Janinji mardumardu muwa, jingkijbangangi ninji yalunya, baku barri jayalu manyiru yajinyi. Jayalu manyiru nanankanyi balkinyi jangkurranyi jali yalu yanyba nganyi. Jayalu manyiru nanankanyi balkinyi jangkurranyi, jalija yalu najba ninya jungunkurri kunyba yurrngumba, durrijbangangi ninji nangangi jangkurr Jesus Krayiskanyi. <sup>17</sup> Jaliyi yingkamukunyi yalu linjumba ninya, baki yiningki janyulu miku kurrkunba yalunya Kudwanyi. Yiningki janyulu munyajba yalunya linjumbikurri ninya. Jayalu linjumba ninya, baki nanankardi janinji jungku mili ngiruka nangangi Kudkanyi. Janinji jungku mili ngiruka baki mili ngiruka nangangi yurrngumba barri. Ngala jaliyi yalu linjumba ninya, yabimbangangi ninji balki yaji yalungi, baki mikuwalii nanangini kijiwanyi yabimba ninya jungunkanyi mili ngiruka nangangi Kudkanyi. Nanda daburrdaburr yaji nganyi. Barriwa.

<sup>18-19</sup> Miku nyuliyanyi yabimba balki yaji Jesus Krayiswanyi. Miku yingamali balki yaji.

Yurrngumba nyuli jungku kunyba nangangi Kudkanyi, ngala nangki janyba kurndana ngamanginkanyi balkinyi yajinyi. Janyba nangki bukambijuungka ngamanginkanyi balkinyi yajinyi. Ngawamba barndaykamba nangki janyba ngamanginkanyi balkinyi yajinyi. Miku nangkiyanyi mili janyba. Jali nyulu kurdan, baki nangangi ngarndu jilajbayi yingkayurri yajiyurri. Jungkuyi nangangi ngarndu nananyina yajina jalili yalu jungku ngarndumuku yalungi kuyuwananyi. Nanaba barri jungkuyi nangangi ngarndu, baki nyuli karu yalunya yingkamuku ngarndumuku nangangi Kudkanyi, nyulu lalanbawarr mardarda. Barriwa. Baki nanankardi janyulu kuyu narrinya nangandurri Kudyurri Jisus Krayiswanyi. Janyulu kuyu narrinya nangandurri Kudyurri bayngkani jalija narringka janyba. Janarri jungku kingkarri nangandu barri.

**20** Nanda wankalanyi ninji Nuwa, nyuli jungku yurlurrrmba nangangi Kudkanyi, baki karuyi Nuwa Kudwanyi, nyulu yabimbiji muwarda. Baki yabimbayi walkurra muwarda Nuwawanyi. Waki nyuli yurrngumba barri, yingkana kindilkurrinyina, baki yingkana kindilkurrinyina. Kajana kindilkurrinyina nyuli waki, baki yukumbayi Kud nangangi, ngala nyuli yabimba nanda muwarda. Ngala nyuli yabimba muwarda, baki karu nyuli yalunya balkimuku nangangi Kudkanyi Nuwawanyi. Nyuli karu yalunya nangangi Kudkanyi, janyulu manjijba walkurra mali, baki jayalu

ngurrulijba malina. Jayalungka janyba malina, jaliyi yalu miku kuyu nangangi jangkurr Kudkanyi, jaliyi yalu miku ngindu muwa yalunginkanyi balkinyi yajinyi. Ngala miku yaliyanyi kuyu nangangi jangkurr Kudkanyi. Miku. Jali bukamba barri nanda muwarda, baki ngankijbayi Nuwa muwardana, baki jawuda nangandu, nangangi maninganja, baki nanganginmuku murrku jandanyimuku, baki yalunginmuku maninganjamuku. Ngawamba yali ngankijba muwardana, 8 barri. Baki marrimbayi yalunya mardarda muwardana Kudwanyi, ngala nyuli manjijba walkurra mali. Ngala nanamuku balkimuku yali ngurrulijba malina. Baki yalunginmuku ngarndumuku jilajbayi nanankurri yajiyurri ngarndunyi. Nanaba yalili jungku ngarndumuku. Jilajbayi Jisus ngarndu yalundurri, baki karu nyuli yalunya nangangi Kudkanyi. Karu nyuli yalunya nangangi Kudkanyi, nyulu nanda lalanbawarr mardarda. Nanaba nyuli jungku marndakaja, baki mili wankambayi Jisus Kudwanyi, nyulu jungunkanyi nangandu. Barriwa.

**21** Marda ngambalimi mankuwa yalunya nanamuku wankalamuku jali yalu miku kuyu nangangi jangkurr Nuwanyi, baki nanankardi yalungki janyba. Ngala ngambala kuyungka nangangi jangkurr Jisus Krayiskanyi, baki nanankardi jangambala jungku wanka nangandu kingkarri. Baki nani barri ngambala jingkijbangka Kud, nyulu nanda lalanbawarr mardarda. Nyuli mili wankamba Jisus Krayis Kudwanyi, baki nani marda janyulu mili

wankamba ngambalanya marda. Janyba nangki Jisus Krayis ngambalangi. Janyba nangki ngamanginkanyi balkinyi yajinyi. Baki nanankardi barri jaliyi ngambala kuyu nangangi jangkurr, baki janyulu marrimba ngambalanya mardarda Kudwanyi. Jala ngamanjalu ngurrunba wabudana, baki ngambala mili walajba wabudananyi. Baki nani barri jali nangki janyba Jisus Krayis, baki mili wankambayi Jisus Krayis Kudwanyi. Baki nani barri jala ngamanjalu ngurrunba wabudana, baki miku nanda barrinani ngambalaka wakardaba mankanyi, ngala nanda barrinani ngambalaka wakardaba kurdulu nangangi Kudkanyi. Baki jala ngambala walajba wabudananyi, baki nanda barrinani jala ngambalaka yangkalamba ngamanbunanyi balkinanyi yajinanyi, baki ngambala jungkuka mili wanka nangangi Kudkanyi. Mankumanku narringka nangangi Nuwanyi. Miku nyuliyanyi ngurrulijba malina, ngala marrimbayi Nuwa mardarda Kudwanyi. Baki jali ngamanjalu ngurrunba wabudana, baki ngambala mili walajbayi wabudananyi. Nanda barrinani marrimbaka ngambalanya mardarda Kudwanyi, baki miku ngambalakiyi janyba yurrngumba barri. Miku ngambalaiyi jungku kurdan yurrngumba barri. <sup>22</sup> Jisus Krayis barri, nyulu jungkuka wanka kingkarri nangandu Kudnyina. Yarrijbayi Jisus Krayis wirimalaru Kudwanyi. Nyulu wirimalaru ngambalangi, baki yalungi marda Yanjilmukuyngka, baki yalungi kunybamuku ngarndumuku jalili yalu jungku

lalijina. Nyulu wirimalaru bukambijuungka yalungi. Barriwa.

## 4

<sup>1-2</sup> Linjumba yali Jisus Krayis mankanyi. Kudanyu yali linjumba mankanyi, baki yali kurdanba. Marda narrimi mankumankuwa Jisus Krayis yurrngumba barri, baki marda narringkimi yangkalamba bukambijunanyi balkinanyi yajinanyi. Marda narringkimi yangkalamba yalunbunanyi, janybangangi nangki Jisus Krayis narrinkanyi balkinyi yajinyi. Jungkuka Jisus Krayis mili wanka barri, baki marda narrimi marda jungku barrinani mili wanka, yabimbikanyi ngawamba kunyba yaji. Jala nganyingka yanyba yabimbikanyi balki yaji, baki marda ninjimi miku mankuwa nanda jangkurr, ngala marda nganyingkimi kurrkunba ngalu yabimbikanyi nanda balki yaji. Marda narrimi yabimba ngawamba nanda jala nulijbangka Kud narrangi yabimbikanyi yaji. <sup>3</sup> Wabula narrili yabimba kaja balki yaji. Nanamanji barri miku narriyanyi jingkijba Kud, baki narri jungkuyi balkina nanganginyina yuwana. Narrili kuluka yingkana jalili miku nganyi kayikayi. Narrili ngaraba kaja kamukamu. Jalili narri malumba jungku, bakili narri jarrba kaja mama, narrili ngaraba kaja kamukamu. Narrili wanindija kulaji, bakili narri yanyba balki jangkurr. Narrili yanyba mududu nanankanyi yajinyi, jala miku duja Kud. Narrili wajba nanda narrinkanyi kunybanyi jangkurranyi, nanda jala miku duja

Kud. Nani barri narrili jungku balki nanamanji. Marda narrimi miku jungku nani nanijba barri. <sup>4</sup> Nanamuku jala miku yalimi jingkijba Kud, yalu manmalangka narrangi. Manmalangka yalu narrangi, mikungangi narrimi jungku malumba yalundu nanijba barri. Miku narrimi jungku malumba yalundu, jala yalu yabimba balki yaji. Wabula barri narrili jungku yalundu, jalili yalu yabimba nanda balki yaji, ngala nanijba barri narri jungkuka kunyba barri. Miku narrimi yabimba mili balki yaji yalundu. Baki nanankardi barri yalu jakakajbangka narrinya, yalu yanybaka balki jangkurr narrangi. <sup>5</sup> Ngala baku barri janyulu karrinjarrijba yalunya Kudwanyi. Janyulu karrinjarrijba bukambiju yalunya walu nangandu barrinani kurdusnyina. Janyulu karrinjarrijba yalunya walu nangandu, nanamuku jali yalungka janyba waluwa, baki nanamuku jala yalu yuwajiwa jungku wanka nanamanji barri. Janyulu karrinjarrijba yalunya walu nangandu, baki janyulu ngajaka yalunya, wanyingkanyi yalu jungku balki. Ngala miku jayalu jingkijba wanyi jangkurr jananganjanyi. Miku. Nani barri janyulu baku barri ngajaka yalunya yalunginkanyi balkinyi yajinyi, baki janyulu ngirrwa yalungi. <sup>6</sup> Nanankardi barri yanybayi Jisus Krayis yalungi ngarndumukuyngka, jali yalungka janyba. Nyuli karu yalunya nanankanyi kunybanyi jangkurranyi nanganginkanyi Kudkanyi. Janyba yalungki, baki jungkuyi yalunginmuku ngarndumuku yajina ngarndunyi. Janyba yalungki, baki ngambala marda jangambalaka

janyba marda. Janyba yalungki, ngala baku barri yalunginyi ngarndumukunyi mankuyi nanda kunyba jangkurr nangangi Jisus Krayiskanyi, baki nanijba barri yuku yalu jungku mili wanka barrinani nyulu jungkuka wanka Kud. Barriwa.

<sup>7</sup> Marndakaja barri wibaja Jisus Krayis, baki nanamanji barri bukambaja yaji. Marda narrimi miku muningka jungku ngala narri yukumba nangangi. Marda narringkimi miku kurrkunba wakinkanyi nangangi Kudkanyi, ngala marda narringkimi kurrkunba yabimbikanyi balki yaji. Marda narrimi jungku jirdi kunybanyi kulajinyi nangangi Kudkanyi. Marda narringkimi na-jbawa, marda narrimi yuwajiwu jungku yurlur-rmba nangangi Kudkanyi. Jaliyi narri jungku nani barri, baki yuku narri yanyba mududu nangangi Kudkanyi. <sup>8</sup> Nayinda barri jirrinyi yaji narri yabimbikanyi. Marda narrimi ku-danyu maruka muwa yalungi krisjimukuyngka. Jaliyi narringka maruka muwa nani barri, baki janyulu manjamanjamba narrangi balki yaji Kudwanyi. Janyulu manjamanjamba nanda kaja balki yaji, jala narri yabimba. <sup>9</sup> Marda narrimi kandimba yalunya, yingkamuku krisjin-muku. Marda narrimi ngajaka yalunya, yalu jungunkanyi narrindu, narringinyina barndana. Marda narrimi kudanyu kandimba yalunya, baki lalanba yalunya. Marda narrimi miku manijiba yalunya narrinbunanyi barndananyi, ngala marda narrimi lalanba yalunya.

<sup>10-11</sup> Yabimbayi narrinya ngiruka Kudwanyi, narri yabimbikanyi yinini yinini yaji nangangi.

Yingkamuku nyuli yabimba yalunya ngiruka, yalu milidimbikanyi yaji. Yingkamuku nyuli yabimba yalunya ngiruka, yalu jungunkanyi mambukamuku jurjkanyi. Yingkamuku nyuli yabimba yalunya ngiruka, yalu karunkanyi yalunya nanganginkanyi kunybanyi jangkurranyi Jesus Krayiskanyi. Nani nyuli yabimba yalunya ngiruka, yalu wakinkanyi nangangi. Marda narrimi waki nani nangangi yurrngumba barri. Jaliyi ninya yabimba ngiruka lalanbikanyi yalunya, baki marda ninjimi kudanyu lalanba yalunya yurrngumba barri. Jaliyi nyulu yabimba ninya ngiruka milidimbikanyi yalunya jurjina, baki marda ninjimi kudanyu milidimba yalunya nanganginkanyi jangkurranyi Kudkanyi. Jaliyi nyulu yabimba ninya ngiruka lalanbikanyi yalunya, baki marda ninjimi kudanyu lalanba yalunya. Nani barri yabimbayi narrinya ngiruka Kudwanyi. Nyuli yabimba narrinya ngiruka, narri yabimbikanyi yinini yinini yaji. Baki janarri yabimba yinini yinini kunyba yaji yalungi yingkamukuyngka. Jaliyi ninji waki nani nangangi Kudkanyi, baki bukambijunyi jangambala wajba Kud ngamanginkanyi kunybanyi jangkurranyi. Jangambala wajba Kud kunybanyi jangkurranyi, nyulungangi yabimbayi ninja ngiruka wakinkanyi nani nangangi. Nyuli yabimba ninja ngiruka, bababanyambangangi nyulu ninja Jesus Krayiswanyi. Ngambala wajbangka Kud ngamanginkanyi kunybanyi jangkurranyi, nyulungangi wirimalaru ngambalangi, nyulungangi ngirukamirra ngambalangi yurrngumba barri. Mikuyaji yingkanyi

barrinani nyulu. Duja barri nayinda jangkurr. Barriwa.

**12** Ngakinmuku bababanyamba ngambalaka, jala ngayu maruka muwa narrangi. Marda narrimi miku manmala yajinyi. Marda narrimi miku manmala jala yingkamukunyi yalu yabimba kiji narrangi. Munyajbangka yalunya Kudwanyi. Nyulu munyajbangka yalunya balanjankanyi kajamuku krisjinmuku nani, baki nanankardi kijinanyi janarri jardijba mili ngiruka nangangi. Janarri jardijba mili ngiruka nangangi jalija narrinya yalu balanja, jalija yalu yabimba kiji narrangi, jalija yalu narrinya linjumba. **13-14** Marda narringkimi mankumanku nangangi Jisus Krayiskanyi. Linjumba yali Jisus Krayis kudanyu barri, baki kurdanba yali. Marda narrimi mirnarrijba muwa jala yalu yabimba kiji narrangi, jala yalu yanyba balki jangkurr narrangi, durrijbangangi narri Jisus Krayis. Marda narrimi mirnarrijba muwa, jungkungangi narri barrinani nyulu jungkuyi. Jayalu yabimba nanamannga balki yaji narrangi barrinani yali yabimba nangangi. Nanankardi barri marda narrimi mirnarrijba muwa, jungkukangangi nanda Kunyba Ngarndu nangangi Kudkanyi narrindu kurduluna. Nyulu yabimbaka narrinya ngiruka Kunybawanyi Ngarnduwanyi, jala yalu balanja narrinya, jala yalu yabimba kiji narrangi. Baki baku barri jalija wijba Jisus Krayis nanginkurri jambarri, baki janarri kudanyu mirnarrijba muwa. Janarri kudanyu mirnarrijba muwa, durrijbangangi narri Jisus Krayis kudanyu barri. **15-16** Jaliyi

narri jungku balki, baki jayalu yabimba balki yaji narrangi, jayalu daba narrinya. Jaliyi ninji kurdanba yingka, jaliyi ninji maninjakujba yaji yingkanyi, jaliyi ninji jilajba nanankurri jala miku nanda nganyi yaji, baki ninya jayalu daba. Jaliyi ninji jungku balki nani barri, baki marda ninyalimi daba. Ngala jaliyi ninji miku jungku balki nani yalu daykanyi ninya, ngala yuwajiwa ninyalu dabangka, ninjingangi Krisjin, baki marda ninjimi miku manyiru. Marda ninjimi miku manyiru, ngala marda ninjimi wajba Kud nganyingkanyi kunybanyi jangkurranyi. Marda ninjimi wajba Kud nganyingkanyi kunybanyi jangkurranyi, nyulungangi yarrijbayi ninya durriykanyi Jisus Krayis. Barriwa.

<sup>17</sup> Marndakaja barri janyulu karrinjarrijba ngambalanya walu nangandu Kudwanyi. Janyulu karrinjarrijba bukambiju ngambalanya walu nangandu, baki janyulu yanyba nanankanyi jalija nyulu yabimba ngambalangi. Waluku barri janyulu yanyba ngambalangi Krisjinmukuyngka, yanka barri ngambala jungkuyi nangangi barri. Baki bayngkani janyulu yanyba yalungi jala yalu miku Krisjinmuku. Baki ngambalaja jingkijba Kud, janyulu daba yalunya, jalili yalu miku jungku yurlurrrmba nangangi, jalili yalu miku kuyu nangangi jangkurr. Janyulu daba yalunya barri. <sup>18</sup> Nanda jangkurr najana Kudkanyi yanybaka nayi barri, “Nanda jardibirri yaji, yalu jungunkanyi yurlurrrmba nangangi Kudkanyi. Jardibirri nanda yalungi. Ngala jaliyi yalu jungku yurlurrrmba nangangi, baki janyulu

marrimba yalunya mardarda. Ngala jaliyi yalu miku jungku yurlurrrmba nangangi, baki nanda balki yalungi. Nanda barri balki yalungi jalili yalu jungku balki nanganginyina yuwana. Miku janyulu marrimba yalunya mardarda Kudwanyi. Miku.” Nani barri yanybaka jangkurr najana Kudkanyi. <sup>19</sup> Yiningki yingkamukunyi jayalu yabimba kiji narrangi, yiningki jayalu linjumba narrinya, jungkungangi narri yurlurrrmba nangangi Kudkanyi. Jalija nyulu munyajba yalunya Kudwanyi, yalu dabankurri narrinya, baki janarri jungku mili ngiruka, baki mili ngiruka nangangi. Jalija narrinya yalu daba, baki marda narrimi yuwajiwa jungku kunyba nanganginyina yuwana, jingkijbangangi narri Kud. Narri jingkijbangka Kud, jalija nyulu yanyba yabimbikanyi yaji, baki janyulu yabimba nanda yaji. Miku nyuliyi yangkalamba nangangi jangkurr. Yabimbayi narrinya Kudwanyi, baki janyulu marrimba narrinya mardarda. Baki baku barri janarri jungku mili wanka kingkarri nangandu. Barriwa.

## 5

<sup>1-2</sup> Ngayu barri malbu jurjkanyi. Jungku ngayi nangandu Jesus Krayisnyina jali nyulu jungku jambana. Jilalajba ngayi nangandu. Najba ngayi jali yalu linjumba Jesus Krayis. Najba ngayi jali nangka janyba kurndana. Baki baku barri jangayu jungku nangandu jalija minimba yalunya nangangi Jesus Krayiskanyi Kudwanyi. Janyulu minimba yalunya nangangi Jesus Krayiskanyi, nyulu wirimalaru yalungi, barrinani Kud nyulu

wirimalaru yalungi. Ngayu jala malbu jurjkanyi, kudanyu ngayu karungka narrinya malbu-malbu jurjkanyi, marda narrimi lalanba yalunya krisjinpuku narrringinyina jurjina. Marda narrimi mirnarrijba muwa jala narri lalanba yalunya. Nani barri nyulu nulijbangka Kud narrangi lalanbikanyi yalunya. Marda narrimi waki nani nangangi, nulijbangkangangi narri nangangi wakinkanyi nangangi. Ngala marda narrimi miku waki nangangi, nulijbangkangangi narri wudumbikanyi kaja dungala yalunbunanyi krisjinpukunanyi. Marda narrimi miku waki nani barri, muningka nulijbangka dunglelanyi.

<sup>3</sup> Marda narrimi miku ngirrwa yalungi jurjina. Marda narrimi miku ngirrwa yalungi barrinani walkurra mambuka ngirrwangka. Ngala marda narrimi lalanba yalunya, marukangangi narri muwa yalungi. Nani barri marda narrimi waki nangangi Kudkanyi. Jala yalu najba narrinya wakinkurri, marukangangi narri muwa yalungi, baki jayalu marda mirnarrijba muwa wakinkanyi nangangi Kudkanyi.

<sup>4</sup> Baki jalija nyulu wijba Jisus Krayis, nanda walkurra lalanbawarr, jalija nyulu wijba wayka nanginkurri jambarri, baki janyulu mirnarrijba muwa narrangi. Janyulu mirnarrijba muwa narrangi, jaliyi narri lalanba yalunya kudanyu barri, jaliyi narri maruka muwa yalungi. Baki nanankardi barri janyulu maruka muwa narrangi marda, baki janyulu yabimba kunyba yaji narrangi, janarri jungku kingkarri nangandu yurrngumba barri. Barriwa.

<sup>5</sup> Baki narri nganinyimuku baki kaburrwaburr

jurjina, marda narrimi jungku barrinani yalu jungku malbumalbu jurjina. Marda narrimi ngayangayijba yalunginkanyi jangkurranyi. Narri bukambiju marda narrimi miku barrarrakijba yajinyi. Marda narringkimi miku yarrijba walkurra yalungi yingkamukuyngka, ngala marda narrimi waki yalungi. Nanda jangkurr najana Kudkanyi yanybaka nayi barri, "Nangka yangkalambaka Kud yalunbunanyi jaliyi yalu barrakijarramuku, jaliyi yalungka walkurramba waluwa yingkamukuyngka. Ngala nangka yangkalambaka yalundurri, jala yalungka bayakardamba, jala yalu mirnarrijba muwa wakinkanyi yalungi yingkamukuyngka. Nyulu yabimbaka kunyba yaji yalungi barri." Nani barri yanybaka jangkurr najana Kudkanyi.

**6** Marda narringkimi bayakardamba nangangi Kudkanyi. Nyulu ngiruka lalanbawarr. Jaliyi narri jungku bayakarda nani nangangi, baki baku barri janyulu walkurramba narrinya. Janarri mili walkurra yalungi, jala yalu nanijba yabimba kiji narrangi. **7** Marda narrimi miku balkijba muwa jala narri kijiyudi, ngala marda narrimi yanyba mududu nangangi Kudkanyi nanankanyi kijinyi, baki janyulu dulaba nanda kiji narrinbunanyi. Baki janarri jungku mardumardu muwa nanankanyi kijinyi, jingkijbangangi narri Kud, kudanyu nyulu lalanbaka narrinya yurrngumba barri. Barriwa.

**8** Ngala marda narrimi najbawa nanda Sayidin. Marda narringkimi birrirrinja nangangi, baki miku nyuliyi yangkalamba narrinya nanganbunanyi Jisus Krayisnanyi.

Nanangini Sayidinwanyi, nyulu yabimbaka kiji narrangi. Nyulu yabimbaka yalunya yingkamuku linjumbikanyi narrinya. Nani barri nyulu yabimbaka kiji narrangi. Nyulu nulijbangka yangkalambikanyi narrinya nanganbunanyi Jesus Krayisnanyi. Nyulu nulijbangka marrimbikanyi narrinya. Nyulu barrinani mardumbarra, marrimba jala yaji. Nyulu nulijbangka marrimbikanyi narrinya. Nanankardi barri marda narrimi najbawa nanda Sayidin. <sup>9</sup> Jala nyulu yabimbaka kiji narrangi, baki miku narriyi marrala nangangi, ngala janarri yurlwa nangangi. Janyulu balanja narrinya, ngala narrinkaja yangkalamba nanganbunanyi Sayidinanyi. Janarri miku kuyu nangangi jujambawarr jangkurr, jingkijbangkangangi narri Kud, janyulu lalanba narrinya kudanyu barri. Baki narri jingkijbangka yalunya krisjinmuku jala yalu jungku yingkana yajina baki yingkana yajina wandijiyana. Narri jingkijbangka yalunya, yalu marda jungkuka kijiyudi, barrinani narri jungkuka kijiyudi. <sup>10</sup> Jayalu yabimba kiji narrangi yingkamukunyi, jayalu linjumba narrinya, ngala marndakaja barri janyulu yabimba kunyba yaji narrangi Kudwanyi. Nyulu ngambalangi wirimalaru, baki janyulu yabimba narrinya ngiruka nangangi. Baki miku narrinkiyi yangkalamba nanganbunanyi. Nyuli yarrijba narrinya jungunkanyi kingkarri nangandu. Janarri jungku kingkarri nangandu, nyulungangi bababanyamba narrinya Jusus Krayiswanyi. <sup>11</sup> Ngambala wajbangka Kud

ngamanginkanyi kunybanyi jangkurranyi, nyulungangi ngirukamirra, nyulungangi ngambalangi wirimalaru. Nyulu wirimalaru bukambiluyngka yajinyi yurrgumba barri. Duja barri nayinda jangkurr. Barriwa.

<sup>12</sup> Ngawamba kujajarra jangkurr ngayu manjijbangka narrindurri. Nanangini Silaswanyi, nyulu yarrijbangka nayinda ngaki jangkurr na-jana. Nyulu kunyba nganinyi. Nyulu barri-nani bababanyamba ngalingka. Ngayu jingki-jbangka Silas, nyulu jungkuka yurlurrrmba yur-rngumba barri. Ngayu manjijbangka nayinda jangkurr narrindurri, nulijbangangi ngayu nar-ringi, narri mirnarriyanyi muwa nangangi Kudkanyi. Nayinda duja jangkurr. Mun-yajbangka yalunya Kudwanyi, yalu yabimbiji kiji narrangi, baki janarri jungku mili ngiruka nangangi. Nani barri nyulu yabimbaka kun-yba yaji narrangi Kudwanyi. Marda narrimi jungku ngiruka nangangi yurrgumba barri.

<sup>13</sup> Nanamukunyi jalili yalu malumba jungku jurjina nananyina yajina niji Babilun, yalu manjijbangka jangkurr narrindurri. Yarribayi yalunya Krisjinmuku Kudwanyi, barri-nani narrinya yarrijbayi Krisjinmuku Kudwanyi. Yalu barrinani mungkijimuku narrangi. Baki nanangini yingkawanyi Makwanyi, nyulu marda manjijbangka jangkurr narrindurri. Kudanyu ngayu marukangka muwa nangangi. Nyulu barrinani jandanyi ngaki. <sup>14</sup> Jalija narri yidamba yalunya yingkamuku Krisjinmuku, baki marda narrimi minimba yalunya, narri marukangka muwa yalungi. Yanyba ngayu mududu nangangi

Jesus Krayiskanyi, jala nyulu bababanyamba narrinya. Ngajaka ngayu Jesus Krayis, janyulu yabimba narrinya jungunkanyi mardumardu muwa. Barriwa barri. Bukamba nayinda jangkurr.

**Shorter New Testament  
The Shorter New Testament in the Garrwa language  
of Australia**

copyright © 1983 Wycliffe Bible Translators, Inc.

Language: Garrwa

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-12

---

PDF generated using Haiola and XeLaTeX on 11 Nov 2022 from source files dated 22 Nov 2019

2ab1948b-2cc0-5834-8f8e-f05a382de0ea